



17 JUN, 2025

Projek Grid Kuasa ASEAN mampu tarik pelaburan luar

Utusan Malaysia, Malaysia



Projek Grid Kuasa ASEAN mampu tarik pelaburan luar

KUALA LUMPUR: ASEAN kini dalam usaha menjadi satu daripada pembekal utama tenaga boleh baharu terkemuka di dunia melalui kerjasama erat antara negara anggota.

Timbalan Perdana Menteri, Datuk Seri Fadillah Yusof berkata, dalam usaha tersebut, Malaysia selaku Pengerusi ASEAN memainkan peranan penting dalam Projek Grid Kuasa ASEAN (ASEAN Power Grid - APG) dan melihat ia sebagai langkah strategik dalam memastikan keselamatan tenaga dan kestabilan alam sekitar lebih terjamin.

Malah jelasnya, beliau yakin perancangan tersebut mampu menarik pelaburan luar.

"Kami menyasarkan untuk menyediakan hala tuju ASEAN Power Grid-APG menjelang akhir tahun ini, ketika Malaysia mempengerusikan ASEAN. Filipina dijangka akan meneruskan pelaksanaannya tahun hadapan," katanya.

Beliau berkata dalam Forum Memacu Ekosistem Tenaga Masa Depan Asia semasa Persidangan Energy Asia 2025 di Pusat Konvensyen Kuala Lumpur (KLCC) di sini, semalam.

Setakat ini, lima negara ASEAN telah dihubungkan menerusi grid kuasa serantau, ter-



FADILLAH Yusof (dua kanan) bersama Ketua Setiausaha Pertubuhan Negara Pengeksport Petroleum (OPEC), Haitham Al Ghais (dua kiri) pada sesi dialog Ekosistem Tenaga Masa Depan Asia sempena Energy Asia 2025 di KLCC semalam. – UTUSAN/MUHAMAD IQBAL ROSLI

masuk melalui Projek Integrasi Kuasa Laos-Thailand-Malaysia-Singapura (LTMS-PIP) yang dianggap sebagai projek perintis.

Bagaimanapun katanya, antara cabaran utama yang perlu dihadapi adalah menyelaraskan piawaian dan peraturan teknikal, menyusun model perniagaan dan pembiayaan serantau serta membangunkan infrastruktur kabel dasar laut serta teknologi.

Selain itu, Fadillah yang juga Menteri Peralihan Tenaga Dan

Transformasi Air berkata, ASEAN kini sedang merancang untuk menubuhkan sebuah badan pengawal selia serantau bagi menyelaras dasar dan pelaksanaan tenaga antara negara anggota.

Dalam perkembangan berkaitan, beliau turut menjelaskan, Malaysia bersedia memainkan peranan utama dalam menjayakan penyambungan Grid Tenaga ASEAN dengan pelaburan besar sebanyak AS\$40 bilion (RM188 bilion) bagi menaik taraf sistem

grid negara.

Katanya lagi, pelaburan tersebut adalah sebahagian daripada persediaan Malaysia untuk melaksanakan agenda serantau yang lebih besar dengan menyambungkan grid tenaga negara dengan semua negara anggota ASEAN menjelang 2027.

"Ini satu langkah ke arah merealisasikan grid tenaga ASEAN sepenuhnya. Kami sedang bersedia dari segi infrastruktur dalam negara sebelum disambungkan ke serantau," jelasnya.